

Kálaad ashúshwóógú Pwôl nyə á cilə buud ó Tesaloníka yé

Isâ í dúgyá nə kálaad ashúshwóógú mə Pwôl shú Tesaloníka yí

Ja Pwôl nyə á ngə sá njəond yé ábée yí, nyə á kumə Tesaloníka a ngə zhu Filipî. Ja jəong wə nyə á fwɔ Dɔ á cínəng yí. Nji, Oyúden bwə á leel zə fəm nyə, obúgula bwə mú sá ná bá Sílas bwə túbúg ibulú ibulú kə Berê. (Mis 17.1-10).

Nə ndeé, ja Pwôl bəndə gwoong jé bwə á bə Atên yí, nyə á kənd Timotê ná a kég dúg nda mísəon ngə bə Tesaloníka ná. Timotê nyə á ka kə, a mú nyingə, kə bwəma nə gwoong Kərênt. A mú jaaw Pwôl ná obúgula wə Tesaloníka bwə ngə kə nə búgə shwóg, nji, búsə nə bíl isâ bwə ngə cəel mpu yí. Pwôl nyə á ka cilə bwo kálaad éga.

Sé bí nə nkul ci ná kálaad wəongú ji nə mənkwə ntúga:

- (1) Pwôl mə yé Zembî akíba nəcé məkəl á mə bii má mə lwó ná obúgula wə Tesaloníka búsə nə kuú njəond í jéla nə bə yuug yí.
- (2) A nyingə báágulə jaaw bwo iséy nyə á téd yí, a ngə ntəg cəel ná bəndə bwə nyíngəg dúgya (1.1-3.13).
- (3) A bándúlə bwo ná bwə wáág nkul nə ngələ kwambulə kuú njəond wəng (4.1-12).
- (4) A mú námə ka jínguli bwo sá í dúgya nə shwi y nə zíyé mə Yésus-Kríst yí (4.13-5.11).
- (5) A ka kə shínal kálaad nə baalé mácwūng nə məbədə (5.12-28).

Məbədə

¹ Mə Pwôl wə mə cílə bí kálaad éga, sónóŋ Silvê nə Timotê. Sá mə cilə bî *Dɔ́ á Tesaloníka, Dɔ́ dúúsé Dɔ́ mə Zembî Sóóŋgú bá Cwám̄ba Yésus-Krîst yí. Zembî kə sá bí mpaam, kə sá nómə ná bi cúgəg nó shee.

Obúgula wâ Tesaloníka bwə á bæ nə fwámé búgá

² Sá ŋgə yə Zembî akíba ja jêsh shú dún bi bêsh, sə aŋgê nə bwele yow ŋgələ wá bí májəgula mäsúd. ³ Sá ŋgə bul téduga bí mísh mə Zembî Sóóŋgú íshéd nəc: búgá jín í cúgé ná á shílóg; cecilí jín nda bæ á shwánág; bwándulə bí ŋgə bwánd Cwám̄ba íshé Yésus-Krîst nə búgá yí wúsə álal-ŋkul. ⁴ Yé bwááŋg Zembî mə céel wá, sə ŋgə téduga bí ntó, sə ŋgə mpu ná Zembî nyə a féesh bî. ⁵ Jí ntó. Jɔjɔ Kéel sə á ŋgə bwiing bí yé nyə a shígé bæ nji iciyá í mpu; ŋkɛŋkɛ Shíshim nyə á ŋgə lwándulə iciyá byooŋgú nə ŋkul mə Zembî, sə ŋgə *búgula nə milám mísú myêsh. Kuú njooŋd sə á ŋgə kyey yí, í á bæ shú mənywa mún, bi a shí dúg wə.

⁶ Bî a dúg, bi mú nómə sá nda sə, sá nómə nda Cwám̄ba, bí lóg Jɔjɔ Kéel nə məshusug mə á ŋgə zhu wə ŋkɛŋkɛ Shíshim má, í njúl nó bi á bæ *íncwaw í ntug dí ná liid. ⁷ Sâ jooŋg í mə sá ná obúgula bêsh wâ Masedwân nə booŋg wâ Akayî bwə mú dɔ́ ŋwa yuug nə bî.

⁸ Kéel mə Cwám̄ba í á mə lás nún bídí nda kwólóŋ; lânɔ́ í mə kyey kúl jêsh nó bi mú fwámé óbúgula ó Zembî; mə ŋgə ci ná kúl jêsh, kú ná bæ nji Masedwân nə Akayî. Í cúgé ná nyiŋgə bæ sâ sə bwíŋgug. ⁹ Jí ntó. Buud bwáméfwó bwə ŋgə jaaw nda bí á mə lóg sə fwámé lóg nó; ná bi a mə yíl mílám ózembî ó ayadúg dí, kənd wə Zembî shú ná bi séyúg nə Zembî jí fwámé Zembî yé, Zembî á kuwô. ¹⁰ Bwə ŋgə

1:1 Silvê: 2Kr 1.19; 2Te 1.1; 1Pr 5.12 Timotê: 1Kr 4.17
 Tesaloníka: Mis 17.1 1:2 2.13; Flp 1.3; Kol 1.3; 2Te 1.3; 2.13 1:3
 5.1-2 1:4 2Te 2.13, 16 1:5 1Kr 4.20 1:6 Mis 17.5-9; 2Kr 6.10; 2Te
 3.7, 9 1:8 Rom 1.8 1:9 Yuá 17.3; Mis 14.15 1:10 5.1-2, 9; Rom 5.9

námá jaaw ná bí ngə bwánd Mwân yé ná a bá zhu gwôw, Mwân yé Yésus nyáméfwó nyə a gwúmashi yé, nyə wé nyə a mé sá ná shé fáámugí nə mpimbə má Zembî.

2

Iséy Pwôl nyə á sêy Tesaloníka yí

¹ Bwaang, ngaá ná biméfwó bi mə mpú ná njəond wúsú sá á zə bídí yí í áshígé bə ná sá á fándá zə ngə kyey ntó? ² Bi mə mpú ná sá á zə wóós bídí sá má fwo bul jug, sá á bwəma nə cúgá Filipî. Nji, Zembî wúsú nyə á yə sá ñkánj í á jəla yí. Ñkánj byəəng wá í á sá ná, mizhízhíj mí á tɛem ngə lúmbuli nə sá məzhií mēsh íí, sá báá sá á ngə námá bwiiŋg bí Jɔjɔ Kéel má Zembî. ³ Bi má jəlá nə mpu cínəng ná sá a shígé ngə bwiiŋg bí Kéel dəəngú nə mitədúgá mí íwushî, sá áshígé ngə sêy nə milám mímbá, kú sá íséy í məkáŋ. ⁴ Í yidá bə ná, Zembî nyə á fwo faas sê ná ndéé a mú magulə sê, a mú yə sá Jɔjɔ Kéel ná sá kág ngə bwiiŋg. Ntó, lású sá á ngə lás yí, sá a shígé ngə lás wə mbií á ná buud bwó fáágug sê; sá á ngə yida lás mbií á ná Zembî gwágúg sê nywa, nyə muud mə dɔ dúg mitədúgá myâ milám yé.

⁵ Haaw. Bi mə mpú ná sá a shígé bwele jwáŋgulə múúd nə iciyá í mpu, sá nda sá mísóólúgú mí ncwaŋgá, Zembî ji wúshined. ⁶ Sá áshígé ngə sɔ gúmə tɔɔ bídí, tɔɔ bóól búud dí. ⁷ Í njúl ná sá á shí bə nə zhií ná sá zág lwó bí mpêl. Ngaá nə *buud ɔ lwámá ɔ *Krîst bí nə ñkul lwó búud mpêl? Nji, sá á yida ŋwa bí nə lâm məcəy nda nyəəngú má ñkánjúlá bwân yé. ⁸ Mətag məəng mə á sá ná, sá á tɛem yə bí Jɔjɔ Kéel, sá á ngə jii jiiŋ ná sá má yə námá bí icug bisú yâ sáméfwó, nəcé bi á shín zə bə sá wəalám.

⁹ Bwaang, ngaá bí ngə táduga wádúgálə sá á ngə wáduga

2:1 1.5, 9 2:2 Mis 16.19-24; 17.1-9 2:3 2Kr 4.2 2:4 Zhe 11.20;
 1Tm 1.11; Gal 1.10; Ifz 3.2 2:5 2.10; Mis 20.33; 2Kr 1.23 2:6 Yuá 5.41, 44
 2:9 2Te 3.7-9; Mis 18.3

sêy yí. Sá á ηγə cúndə bí Jɔjɔ Kéel sáméfwó sá dúgə sêy bulú nə mwásé shú nə tɔɔ muud ηgwúnd nə ηgwúnd nda ηkêny mbag wúsú. ¹⁰ Bí bí owúshined, Zembî námé wúshined ná kuú njɔɔnd sá á ηγə kyey nə bí obúgula yí í á bə kuú njɔɔnd Zembî mə céel yí, kuú njɔɔnd á otútəlí, nda nə sâ á jumág. ¹¹ Bì mə mpú námé ná sá á ηγə ηwa muud yêsh a bídí nda sóɔngú mə du ηwa bwân ná. ¹² Sá á du cwîny bì, du ləl bì mənnyúul, sá du báásulə bí ná bí kyéyug kuú njɔɔnd Zembî mə céel yí. Bì mə jəlá nə cugə ntó nəcə Zembî nyə á jôw bí ná bí bəg buud ó Faan dé, ηwa dún kəw nyádí gúmád.

¹³ Sá ηγə námé yə Zembî akíba nə gúl sâ; jí ná, ja bí á gwág Milósú mí Zembî sá á bwiing bí myá, bí á lág myo nda mísə ná. Bì a lág myo ná mísə Milósú mí Zembî, kú bə kéel yâ buud ɔ shí ga. Milósú mí Zembî myɔɔng wə mí ηgə sêy bí obúgula dí ícugud.

¹⁴ Ná ndéé bwaang, bí a mə sá námé nda mədɔ mə Zembî mäsə Yudéa mə ηgə bɛ Yésus-Krîst má. Buud ó lɔɔm bún bwə á mə námé wáamb bì nə ifumuga námé nda *Oyúden bwə á wáamb mədɔ mɔɔngú nə ifumuga ná.

¹⁵ Oyúden bɔɔng bwə á gwú Cwámba Yésus-Krîst, bwə gwú *buud ɔ mícúndá, bwə á jág námé bul wáamb sá nə ifumuga. Zembî nyə anɔgê nə gwág bwo nywa, bwə ηγə lúmbulí nə buud bêsh. ¹⁶ Bwə ηγə ntágulə sê ná sá nda bwiing íkúl ishús Jɔjɔ Kéel, bwə acéélé ná íkúl byɔɔng í dúgúg cug. Sálə bwə ηgə sá ntó yí, bwə ηγə casulə *sám wáj ná í bəg ncindí. Bwə á mə ka bwəma nə mpimbə mə Zembî.

Pwól nə yéesh ná a ké dúg ókrîsten wâ Tesaloníka

2:10 2.5 2:11 Mis 20.31 2:12 4.1; Rom 5.2; Flp 1.27 2:13 1.2-3;
Gal 1.11-12 2:14 Mis 17.5 2:15 Mis 2.23; 9.23, 29; 13.45, 50; 14.2, 5, 19;
17.5, 13; Rom 11.28; 2Kr 11.23-29 2:16 Mat 23.31-33

¹⁷ Bwaang, sé bân jísú kóómb di, tɛem bæ né sé á má béégya nə bí fúfwálá mísh mészú nda ná dúg bí, milám mísú myáá mí leedyá nə bí. Ntó, nda sé á bul bæ nə məma yéesh ná sé nyíngəg dúg bí nə, sé á ngə yáág ná sé má zə nún bídí.
¹⁸ Búbálé sé á má yáág ɲkí ja ɲgwúd ɲkí ija íbá ná sé má zə dúg bí, ná ndéé mə Pwól; ká, *Sátan nyə a má ntágulə ná sé nda zə. ¹⁹ Ye bi ampúyé ná bi wə ɲgə sá ná sé ɲgəg nə bwánd Cwamba Yésus nə búgə? ɲgaá məshusug məsú má ɲgə zhu bídí? Bi wə jí *túm gúmə sé má bá ɲgə bæɣwa ná ndí Yésus dí míshúd ja á bá nyíngə zə yí. ²⁰ Mpugá ná bi wə bí sé sâ gúmə, bi wə bí sé sâ məshusug.

3

Pwól nyə á kənd Timotê Tesaloníka

¹ Zhúgúlá zhúgúlâ, nda sé áshígé ná nyíngə jísow ɲgələ ji nda gwáduga bí nə, sé á dúg ná í nywa ná sé lúgúg fwó Atên. ² Sé mú nti *mínyəɲú wúsú Timotê muud bá Zembí bwə ɲgə námə sɛy séy bwiingúlə Jɔjɔ Kéel yé. Sé mú nti nyə ná a zəg sá ná bí bəg nə ɲkán búgə jínúd, zə cwíny bí. ³ Haaw. Í á jii ná bí bəg nə ɲkán búgə jínúd shú ná məntágula má nda tí múúd məkuú shí. Biméfwó bí mə mpú ná məntágula mənɪ məsə dúsú kow Zembí nyə á yə sé yí. ⁴ ɲgaá ná ja sé á bæ nún bídí yí sé á shí bwey ɲgə jaaw bí ná sé é bwəma nə məntágula? Ntó námə wə í má bæ éga, bí mə mpú ntó. ⁵ Ná ndéé, nda méé mə áshígé ná nyíngə jísow ɲgələ ji nda gwáduga bí nə, mə á nti Timotê ná a zəg wámbulə nda bí ɲgə cugə cug búgə jín ná. Mə á ɲgə bæemb ná Mása məbwəbúlán nyə a bá bwówulə bí ná ndéé ɲjugú sé á ɲwa yí mú yə íyíy-yíy.

2:17 3:10 2:19 1Kr 9.24-25; Flp 4.1; 2Te 1.4 3:1 Mis 17.15 3:2
 Timotê: 1.1 3:3 Ifz 3.13; 2Te 1.4; 2Tm 3.12 3:4 Mis 14.22 3:5 Flp
 2.16

⁶ Ná ndeé, Timotê má wóós wa wúlə nūŋ bídí. A má zə nə sé jɔjɔ məkəl ná bí ŋgə ná kə shwóg nə búgə jín nə cɛlí jín. A jaaw námá sé ná bí ŋgə ná téduga sé tédugálə ányunywaâ, bi njúl nə məma yéesh ná bi mə dúg sé, nda sé bí námá nə yéesh ná sé má dúg bí ná. ⁷ Gwə wə jí ná, bwaanɔ, məfúfə nə məbwəbúlán mə tɛem ŋgə ntágulə sé, mənyúúl mə má bul nyinɔ lal sé nə gwádúgálə búgə jín. ⁸ Sé má nyinɔ cugə ja gaád nəcé sé má gwág ná bi mə nada nə Cwámba. ⁹ Sé bí bul bə nə məshusug nə bí mísh má Zembî íshéd, nda ná mpu bímbí sé bí nə ŋkul yə nyə akíba yí. ¹⁰ Sé ŋgə jəgula nə Zembî ntɔ mínji. Bulú nə mwásé sé ŋgə jəgula ná shé nyinɔgəg dúgya, sé zəg lwándulə sâ í ŋgə ná fúfə bí búgə dí yí.

¹¹ Sónɔngú íshé Zembî nyáméfwó bá Cwámba íshé Yésus bwə sáág ná zhií zólə nūŋ bídí í bág sé nə wan wan. ¹² Bí ŋgə ciila mpádúgá nyín, bi ŋgə námá cɛel bóól búúd bēsh. Cwámba sáág nə cɛlí jəɔŋ í ŋgəg nə yáág yáágúg námá nda cɛlí sé ŋgə cɛel bí yí. ¹³ A sáág ná milám mí bəg nda ŋkúnkulə bî, bi bág bə nə kuú njəɔnd Zembî mə cɛel yí, kú nə sâ á jumúg mísh má Sónɔngú íshé Zembî dí ja Cwámba íshé Yésus bəndəŋ buud bé bēsh bwə bá zə yí. Amen.

4

Fwámé kuú njəɔnd

¹ Ná ndeé bwaanɔ, sé á shí lwó bí kuú njəɔnd Zembî mə cɛel yí, bi mú námá ŋgə kyey wə. Ná ndeé, kəgá nə kuú njəɔnd wəɔŋg shwóg ŋgə yáág yáágúg; sé ŋgə bándulə bí ntó jíné má Cwámba Yésus dí. ² Bi mə mpú məcwūŋ sé á cwīny bí nə ŋkul mə Cwámba Yésus má. ³ Ŋkúmba sâ Zembî ŋgə jii yí jí ná bi cúgəg mbií á cɛel yí. Kwanzugá

3:6 Mis 18.5; 2Te 1.3; 1Tm 1.5; Flm 5-7; Gal 5.6 3:7 2Te 1.4 3:10 2.17
 3:12 Gal 6.10 3:13 5.1-2; Flp 1.10 4:1 2.13; Kol 1.10; 2Te 3.6 4:3
 5.23; 1Kr 6.13; Heb 10.10

jannga. ⁴ Muud yêsh cûgæg nê nyúúl nyé* mbií Zembî mæ cêel yí, ñwa nyə nê mäjilə; ⁵ kú bɛ bów-bôw íyéesh nda buud bwá ampúyé Zembî wá. ⁶ Muud nda nyúg *mínyonhû na sâ nííð, nda ntɔ mínji. Nəcə Cwám̄ba m̄ó d̄u kunda búúd ísâ ínííð; sá á shí bwey d̄u jaaw bí ntó, sá ñgə námə nyiñgə báásulə jaaw bí ntó. ⁷ Mpugá nê njúwúlú Zembî nyə a jôw shé yí í áshígé bə nê shé ñgæg nê kə shwóg ñgə sá ísâ í ádudaná; í á yida bə nê shé cûgæg mbií á cêel yí. ⁸ Nê ndéé, muud mæ bán mæcwûñ m̄óga yé nyə abáné múud, á ban Zembî muud ñgə yə bí ñkɛñkɛ Shíshim yé.

⁹ Shú sâ í dúgyá nê cêelí á mpédúgá omínyonhû yí, í ajíyé nê mæ cíløg bí, nəcə mæ mpú nê Zembî nyəméfwo nyə á m̄ó jííngulí bí nda bí m̄ó jálá nê ciila mpédúgá nyín nê. ¹⁰ Bí ñgə ntâg námə bwey lwóya cêelí jooñgú nê omínyonhû ó íshé bēsh wā Masedwān yēsh. Bwaañg, sá m̄ó bándúlá bí nê bí kág nê cêelí jooñg shwóg ñgə yáág yáágúg, ¹¹ bulugá sɔ cug m̄átəla, muud bul sɔ nê á dúgúg ñji sâ í dúgyá nê nyə yí, sɔ nê a séyúg nê mæbwá mé nda sá á cwîny bí nê. ¹² Ságá ntó shú nê bí cûgæg cug í é bə nê mäjilə mísh m̄ó buud bwá cúgé *Dɔ dí wá; bí nda sá nê bóól búúd bwá ñgæg nê ñkény mbag wún.

Zembî mæ bá gwûmushi omínyonhû ó íshé

¹³ Bwaañg, sá acéélé nê bí dúg jág sâ í dúgyá nê okristen bwá á m̄ó kə ígwád wá yí. Í jii nê bí dúg mpu, shú nê bí kú d̄u bə nê shúsúlú shúsúlú nda buud bwá áñgê nê bwánd nê búgə wá. ¹⁴ Shé ñgə *magulə nê Yésus nyə á yə a mú nyiñgə gwûm, shé máguləgá námə nê, booñg bwá á yə bwá

* 4:4 Bóól bwá ci na ná: «Muud yêsh cûgæg nê yé múdá». 4:7 4.3; 1Pr 1.15-16 4:8 1Kr 6.19-20 4:9 Zhe 31.33-34; Gal 6.10; Ifz 5.2 4:10 2Te 3.4 4:11 2.9; Ifz 4.28; 2Te 3.10, 12 4:12 1Kr 5.12-13; Kol 4.5 4:13 5.1-2; 1Kr 15.51-52 4:13 1Kr 15.18-19; Ifz 2.12 4:14 Rom 14.9; 1Kr 15.3-4, 12, 20

ηγά *búgula Yésus wá, Zembî mæ bá gwûmushi bwo a mú kə nə bə́nónη Yésus.

¹⁵ Gúl sâ sé ηγά jaaw bí Cwám̄ba nyə a ci wə ga: ja Cwám̄ba mæ bá nyingə zə yí, shé buud mæ bá bə shé ηγά ná dúgya wá, shé ábúlé kə shwóg, lúgə bə́ɔηg bwə mə yə wá mpúsə. ¹⁶ Nəcə í bá bə nó, buud bwə bá gwág kəl ηγά cúndə, wúl kúkú má *wééηgəles ηγά wéeshuli kəl, laag má Zembî ηγά lás, Cwám̄ba nyəméfwo mú shulə wú jon dí, buud bwə á yə bwə njúl búúd ɔ *Kříst wá bwə mú tééd gwúm. ¹⁷ Bwə ká shîn gwúm ntúni, shé buud mæ bá bə shé ηγά ná dúgya wá, shé mú sɛηgya nə bwo nə ndéé sónónη mú ηkân kə míηkúdíđ kə bwəma nə Cwám̄ba nūη míηgúlúđ; sónónη sé mú ji kandugə á kandugə. ¹⁸ Dugá wíya ηkul mílámúđ nə iciyá ini.

5

Muud nyə ampúyé jwôw Cwám̄ba mæ bá zə yí

¹ Bwaang, í anyíηgəyé j̄i nə mə cílɛg bí shú sâ í dúgyá nə məfwála nə ija ísâ í bá s̄iy yí. ² Nəcə biméfwo bi mə mpú nə s̄aj s̄aj nə jwôw mə Cwám̄ba í bá zə wós nda júwâl í d̄u zə mpwó-bulú nó. ³ Buud bwə bá ηgə ci ná: «Huúuη! A m̄η mətəla e! Kú nə tɔɔ sâ í kənd múúd lám gwôw!» Í bá bə, buud bwə ηγά lás ntó, byéndí í ɔ wós bwo məseegya, námə nda məcəy mə minú mə d̄u wós múdá á bum məsh̄iiga ná. Bwə ábúle faam. ⁴ Ká, bwaang, bi báá cugé yídúgúđ*. Jwôw dɔɔηgú í ábúle wós bí nda júwâl. ⁵ B̄i báá bú sə bwán ɔ m̄ηkenya bi bēsh, bwán ɔ mwásə.

4:15 1Kr 7.10, 25 4:16 1Kr 15.23 4:17 Yuá 12.26; Rom 5.17; Flp 3.20 5:2 1.2-3, 10; 2.19; 3.13; 5.23; Mat 24.36; Flp 4.5; 2Te 1.7, 10; 2.1-2 wós nda júwâl: Mat 24.43; 2Pr 3.10; Mbú 3.3; 16.15 5:3 Zhe 6.14-15; Mat 24.39 * 5:4 Buud bwə afwóyé magulə Yésus wá bwə ηgə ηkúnkulə nə cug kú mpu shwóg kú mpu shug: bú sə yídúgúđ. 5:5 Rom 13.11-12; Ifz 5.8-9

Shé cugé búúd ɔ búlú, búúd ɔ yídúgá. ⁶ Nda jí ntó ná, shé ajáláyé nà kə ígwád nda bóól búúd bwé ngá kə ígwád ná; shé má jəlá nə ji ŋkasə, shé də cunal íyéesh íshé.

⁷ Nəcə ná, buud bwé də kə ígwád wá bwé də kə ígwád íbulú, ɔngule də fudə nə məlwəg íbulú. ⁸ Shé bəŋ buud ɔ mwásá, shé dúgá cunal íyéesh í íshé. Ntó, í jii ná shé ŋwág búgá nə ceełí búdal íbəd dí tən nda búduga í ŋkwánz ózimbi bwé də bwáád bəd dí yí, shé ka ngə bwánd nə búgá ná Cwámbe mə bá sá ná shé fáámug nə intúgúlı, bwándúle wəŋgú í bə shé nda tım ŋkwánz zimbi má də búdal lúúd yí. ⁹ Nəcə ná, Zembî nyə a shíge féesh shé ná shé zəg yida bwəma nə mpimbə jé; nyə a féesh shé ná shé dúgúg cug zhíí mə Cwámbe íshé Yésus-Kríst dí. ¹⁰ Ŋgaá ná Yésus wəŋg wə nyə á yə shwiy dúsú? Haaw! Nyə á yə shú ná sánŋə sá cugəg, tɔɔ shé má ji ŋkasə, tɔɔ shé má nyiŋgə kə ígwád. ¹¹ Né ndéé, dugá sá ná, bóól wá bóól ŋkúl mílámád, bóól sá ná bóól búgá í lálug, nda bí mú ngə bwey sá ná.

Məcwŋŋ mə məzhúgálá

¹² Bwaŋg, sá ngə námé ci nə bí ná, bəŋg bwé təl bí shwóg bwé ngə wáduga ngə cwŋny bí cug krísten dí wá, dugá ŋwa bwo nə məjilə. ¹³ Dugá yə bwo gúmá, bí ceeł bwo nə fwámé ceełí nəcə séy bwé ngə sēy yí. Cugəgá ná shee mpédúgá nyín.

¹⁴ Bwaŋg, sá ngə yáag nə bí ná bí dúg lás nə bəŋg bwé acéélé sēy wá; bí sá ná bəŋg búśə nə ŋkwə wá bwé wínzhuəg mənnyúul, ná bəŋg búśə nə iləm wá məkuú má tówúg shí; bəgá nə jísów, də jísow búúd bēsh. ¹⁵ Bí ó bey. Muud nda bweel məbôw ngwól má sá nyə má; yidagá də síya mənnywa mpédúgá nyín, də námé sá búúd bēsh.

¹⁶ Dugá bæ nə məshusug ja jêsh, ¹⁷ du jəgula nə Zembî kú káád, ¹⁸ du yə Zembî akíba nə məfwála mēsh mâ cug jín. Bí buud bí búás búúd ɔ *Krîst Yésus wá, isâ Zembî mə jîí nó bi dúg sá wó íni.

¹⁹ Kúgá ntágulə nə Shíshim mə Zembî bəg kú sêy sêy jé.

²⁰ Kúgá bæeg mpyêny íciyá í *búúd ɔ mícúndá ó Zembî.

²¹ Dugá faas ísâ byêsh, bí du bii nji byəɔng í nywá yí.

²² Bi ɔ káálúgá nə mbíí məbôw wêsh wúsə nə ŋkul shweenzh bí yí.

Ibwádán nə məbódá

²³ Zembî á mpwogé nyəméfwó ká fúb bí ikóómb byêsh; ká baagulə bí ikóómb byêsh, nə *shíshim, nə *jîm, nə nyúúl, byêsh í bág bæ kú nə sá á jumúg ja Cwámba íshé Yésus-Krîst mə bá nyiŋgə zə yí. ²⁴ Muud ŋgá jêw bí yé ji abúgúlág; nyə wə mə bá sá sóólúgú wəɔng.

²⁵ Bwaang, dugá jəgula nə Zembî shú dúsú.

²⁶ Kúlálúgá mə bwáang bēsh məkúlula mə buud ó Zembî.

²⁷ Mə jəgula nə bí jínə mə Cwámba dî nó bi lɔg bwáang bēsh kálaad éga. ²⁸ Cwámba íshé Yésus-Krîst ká sá bí mpaam.

5:16 Flp 4.4 5:17 5.25; Luk 18.1; Rom 12.12; Ifz 6.18; Kol 4.2 5:18 Ifz 5.19-20 5:19 Ifz 4.30 5:21 1Kr 14.29; Ifz 5.10; 1Yn 4.1 5:23 5.1-2; 2Kr 13.11 5:24 1Kr 1.8-9; Flp 1.6; 2Te 3.3 5:25 1.2-3; Rom 15.30 5:26 Rom 16.16 5:27 Kol 4.16

Kálaad Zembî : Sə́ á Gúgwáan New Testament in Makaa

copyright © 2014 Wycliffe Bible Translators, Inc.

Language: Makaa

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Makaa

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

